

Sarajevo, 22.01. 2012.godine

### **Inicijativa za raskid Kolektivnog ugovora za područje telekomunikacija u Federaciji Bosne i Hercegovine**

Udruženje poslodavaca FBiH je dobilo zahtjev od svojih članica da pokrene Inicijativu za raskid Kolektivnog ugovora za područje telekomunikacija u Federaciji Bosne i Hercegovine. S tim u vezi stručna služba je napravila analizu i utvrdila da postoji osnov za pokretanje Inicijative za raskid navedenog KU.

Kolektivni ugovor za područje telekomunikacija u Federaciji BiH su u decembru 2006. godine potpisali tadašnji Federalni ministar prometa i komunikacija, te Predsjednik Sindikata BH Telecoma i Predsjednik Sindikata Hrvatskih telekomunikacija Mostar.

Zakonom o radu („Službene novine FBiH“ br. 43/99, 32/00, 29/03) odnosno njegovim članom 112. stav 1. definisano je da pri zaključivanju kolektivnog ugovora na strani zaposlenika može biti sindikat ili više sindikata, a na strani poslodavaca može biti poslodavac ili udruženje poslodavaca. Izuzetak je predviđen u stavu 3. istog člana kojim je utvrđeno da do formiranja udruge poslodavaca na strani poslodavca u postupku pregovaranja i sklapanja kolektivnog ugovora, može biti Vlada Federacije odnosno Vlada kantona.

Prema članu 39. Općeg kolektivnog ugovora za teritoriju FBiH („Službene novine FBiH“ broj 54/05) kolektivne ugovore za područja djelatnosti zaključuje odgovarajuće udruženje poslodavaca za područje djelatnosti udruženo u Udruženje poslodavaca Federacije BiH.

Udruženje poslodavaca FBiH formirano je 2002. godine. Zakon o radu stupio je na snagu 2000. godine. Opšti kolektivni ugovor je stupio na snagu 2005. godine. Obadva telekom operatora su naše članice, čime smo obezbjedili reprezentativnost za zaključivanje kolektivnog ugovora za područje telekomunikacija. Iz toga proizilazi da Kolektivni ugovor za područje telekomunikacija u FBiH potpisan 2006. godine, s obzirom da nije potpisan od strane Udruženje poslodavaca, nije obavezujući za naše članice BH Telekom dd, Sarajevo i HT Eronet dd, Mostar.

Da izneseno mišljenje nije subjektivno viđenje, možete se uvjeriti ukoliko provjerite vladajuću praksu susjednih zemalja i zemalja EU, te presude domaćih sudova i sudova navedenih zemalja. Naime nedvosmisleno je da kolektivni ugovor za područje djelatnosti može potpisati samo odgovarajuće udruženje poslodavaca, područja djelatnosti, udruženih u UPFBiH. Ukoliko se radi o kolektivnom ugovoru za jednog ili više poslodavaca mogu ga potpisati samo predsjednici Uprava navedenih poslodavaca.

Imajući u vidu navedeno kod potpisivanja Kolektivnog ugovora za područje telekomunikacija u Federaciji BiH u pogledu ugovornih strana isključeni su poslodavci iz procesa pregovaranja i potpisivanja kolektivnog ugovora a što je u suprotnosti, ne samo sa članom 112. Zakona o radu FBiH, nego i sa Konvencijom ILO 98, pogotovu njenim članom 4, i Konvencijom ILO 154, a koje su obavezujuće za BiH.

Shodno navedenom UPFBiH će zatražiti da se hitno raskine predmetni kolektivni ugovor i da se omogući sindikatu i udruženju poslodavaca da slobodnim kolektivnim pregovaranjem regulišu međusobne odnose.